



PARLAMENTO NACIONAL
Secretariado da Bancada Parlamentar de FRETILIN

DEKLARASAUN BA IMPRENSA

Dili, 16 Jullu 2019

BANKADA FRETILIN SEI VOTA KONTRA TENTATIVA SIRA NE'EBÉ ATU LORI TIMOR-LESTE BA UKUN HO DITADURA

Ohin, loron-16 fulan-Jullu tinan-2019, Bankada Parlamentar FRETILIN deklara ba média no públiku tomak katak sei **VOTA KONTRA PAKOTE LEJISLASAUN TOMAK** nebe'e VIII Governu entrega ba Parlamentu Nasionál iha semana kotuk, atu halo alterasaun ba lei sira ne'ebé relasiona ho Tratadu Fronteira Marítima.

Bankada Parlamentár FRETILIN hare katak hahalok ida ne'e hatudu momós VIII Governu Konstitusionál hakarak atu lori dadaun Timor-Leste ba ukun ditadura ida nia okos iha ne'ebé hamihis ka halakon tiha respeita ba Konstituisaun no lei sira. Muda Lei atu implementa vontade ema ida nian. Halo Estado tomak atu hakru'uk ba ema ida deit nia vontade.

Lori Bankada nia naran, Prezidente Bankada FRETILIN Deputadu Aniceto Guterres Lopes, deklara pozisaun ida ne'e tamba razaun hirak tuir mai:

1. Iha deit sesaun lejislativa ida ne'e, Lei sobre Atividades Petrolíferas sei hetan alterasaun dala rua. Lolós, lei ida labele hetan alterasaun liu dala ida iha sesaun lejislativa ida. Alterasaun ba dalarua ne'e hatudu katak VIII Governu no Bankada sira nebe'e aprova alterasaun dahuluk iha sesaun lejislativa ida ne'e rekoñese katak sira halo ona sala iha alterasaun ida uluk, no katak alterasaun sira ne'e la halo ho estudu no analize nebe'e klean no planeadu didiak, no la halo tuir interese Estado nian. Ida ne'e atu halo tuir deit interese sira nebe'e prontu atu impresta osan mai ita, hodi tau fali rikusoi no reseitas minarai Timor-Leste nian hanesan garantia ba sira. Fundo Petrólíferu (Fundu Minarai), ita nia uniku Fundo Soberano, sai fali garantia, no ho ida ne'e ita piñor tiha ita nia rikusoi no loke dalan atu lakon ita nia soberania.
2. Lei Fundo Petrólíferu nu'udár Lei estruturanti ida labele sofre alterasaun narnaran deit. Atu altera lei importante hanesan Lei Fundo Petrólíferu lolós tenki tuir prosesu diálogu no konsulta ho parte relevante sira hotu, inklui Konsellu Konsultivu ba Fundo Petrólíferu (KKFP) no organizaun Sosiedadi Sivil sira. Maibé, ida ne'e la akontese. Lei Fundo Petrólíferu, tanba estruturanti, iha primeira legislatura harii ho diálogu luan ho sosiedade tomak. Tanba ne'e, lolós, atu altera mos tenki iha konsulta luan hanesa uluk. Labele uza deit Tirania maioria nian, at liu tan maioria nebe'e tau hamutuk minoria tolu.

3. Lei Fundu Petrolíferu la hola parte ba pakote lejislasaun sira nebe'e presiza altera agora ba ratifikasaun Tratadu Fronteira Marítima. Lei Fundu Petrolíferu laiha ligasaun ruma ho Tratadu Fronteira Marítima tamba lei ida ne'e regula deit jestaun ba Fundu Petroleu, asuntu interna Timor-Leste nian. Bankada FRETILIN la konkorda atu halo alterasaun ba Lei Fundu Petrolíferu, sa tan altera ho lufu lafu deit no atu benefisia deit grupu balun. Bankada FRETILIN deskonfia katak ida ne'e atu loke dalan deit ba osan nain sira nebe'e atu impresta osan ba Timor-Leste bele kontrola ita nia soberania bainhira Fundu Minarai bele uza ba investe hamutuk ho sira iha atividades oin-oin.
4. Iha fulan Fevereiro ka Marsu tinan-2018, Señor Xanana Gusmão haruka karta ida ba Sua Excelensia Prezidenti Republika no deklara katak nia la rekoñese VII Governu Konstitusionál no katak VII Governu ne'e inkonstitusionál, enkuantu VII Governu duni mak iha lora-6 fulan-Marsu tinan-2018 asina Tratadu Fronteira Marítima. Se Sr. Xanana Gusmão konsistenti duni, nia tuir lolós tenki konsidera katak Tratadu Fronteira Marítima ne'e mós inkonstitusionál, nune'e la merese ratifikasaun agora. Ne'e hatudu deit Señor Xanana Gusmão nia prátika nakonu ho inkoerensia no inkonsistensia. Tanba ne'e FRETILIN deskonfia katak iha manipulasaun oin-oin husi kotuk. Nune'e duni FRETILIN husu diálogo atu hetan esklaresimentu.
5. Povu tomak akompañia katak iha sesaun lejislativa ida ne'e tomak, Parlamentu Nasionál nia plenaria sira laiha agenda no iha deit mak periodu antes-do-dia. VIII Governu rasik la hato'o inisiativa lei ruma mai Parlamentu Nasionál. Maibé, lei hirak ne'ebé atu altera agora ne'e governu lori mai parlamentu atu debate no aprova lalais maske Prezidente Parlamentu rasik la konsidera lei hirak ne'e iha karakter urjensia. Foin semana kotuk mak lori mai atu obriga Parlamentu Nasionál aprova lalais no atu obriga mós Prezidente Repúblika promulga lalais iha fulan-Jullu nia laran. Ida ne'e hotu atu halo tuir ema ida deit nia hakarak no interese.
6. Áktu hirak ne'e hatudu momós violasaun ba Konstituisaun no lei sira no indikasaun forte katak partidu sira ne'ebé mak kaer hela ukun daudaun ne'e hakarak atu lori duni Timor-Leste ba ukun ida ho ditadura no tirania maioria. Halo Governu no obriga Parlamentu Nasionál atu hakruk no halo tuir deit ema ida nia hakarak. No ita hare momós iha tentative atu obriga Prezidente Repúblika halo tuir mós ema ida nia hakarak. Ida ne'e mak ita bolu ditadura.
7. Bankada FRETILIN hakarak mós kestiona kontiudu balu Tratadu ida ne'e nian. Se Tratadu Fronteira Marítima ne'e defini katak kampu Greater Sunrise tomak iha Timor-Leste nia fronteira laran, tamba sá mak Tratadu ida ne'e inklui ona kona ba partilla rekursus. Nune'e mós, se inklui ona partilla rekursus, tamba sá mak la inklui kedas katak pipeline tenki mai Timor-Leste no agora ita sosa fali pipeline? Bankada FRETILIN konsidera inkluzoan partilla rekursu maibé la inklui pipeline mai Timor-

PARLAMENTO NACIONAL
Secretariado da Bancada Parlamentar de FRETILIN

Leste iha tratadu ida ne'e hatudu áktu pinór Timor-Leste nia riku soin no soberania.

FRETILIN hakarak atu husu tan: Tratadu ida ita atu ratifika ne'e Tratado Fronteira Maritima ka Tratadu ida atu fahe rikusoin ho Australia? Sa'ida los mak ita atu 'piñor' ho tratadu ida ne'e? Piñor ta nia soberania ka piñor ita nia rikusoin?

Ho razaun sira nebe'e apresenta iha leten, Bankada FRETILIN deklara katak sei vota kontra pakote proposta lei no rezolusaun tomak ne'ebé atu loke dalan ba ratifikasaun Tratadu Fronteira Marítima nebe'e VIII Governu lori mai no obriga Parlamentu Nasionál atu aprova lalais.

REMATA

ATU HETAN INFORMASAUN LIU TAN, BELE KONTAKTU BANKADA FRETILIN HUSI EMAIL fretilinpn@gmail.com